

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23) i Programa utroška sredstava planiranih Budžetom Zeničko-dobojskog kantona za 2026. godinu u razdjelu 20 – Ministarstvo za rad, socijalnu politiku i izbjeglice – izvor 10 i izvor 40 Budžeta Zeničko-dobojskog kantona za 2026. godinu, broj: 02-11-3006/26 od 18.02.2026. godine i broj: 02-11-4369/26 od 06.03.2026. godine, na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 120. sjednici, održanoj 06.03.2026. godine, d o n o s i

O D L U K U

ostvarivanju pomoći za plaćanje troškova stanovanja osobama izmještenim iz svojih domova oštećenih usljed nesretnih slučajeva u Zeničko-dobojskom kantonu s ciljem hitnog stambenog zbrinjavanja

Član 1.

(Predmet)

(1) Osobama sa područja Zeničko-dobojskog kantona koje su dovedene u stanje socijalne potrebe usljed oštećenja stambenog objekta izazvanog nesretnim slučajem, zbog kojeg je stambeni objekat rizičan za stanovanje ili totalno uništen i koje su izmještene iz svojih domova, pružit će se pomoć za plaćanje troškova stanovanja s ciljem hitnog stambenog zbrinjavanja.

(2) Pravo na pomoć iz stava 1. ovog člana trajat će najduže šest mjeseci od donošenja rješenja o priznavanju prava.

Član 2.

(Ostvarivanje pomoći)

Pomoć iz člana 1. ove odluke osoba u stanju socijalne potrebe će ostvariti pod sljedećim uvjetima:

- a) da je stambeni objekat oštećen, rizičan za stanovanje ili uništen usljed nesretnog slučaja i nije uvjetan za stanovanje u skladu sa propisanim stambenim standardima,
- b) da je porodica čiji je stambeni objekat oštećen, rizičan za stanovanje ili totalno uništen na dan nastanka nesretnog slučaja živjela u predmetnom stambenom objektu,
- c) da je utvrđeno pravo vlasništva/posjeda nad predmetnim stambenim objektom,
- d) da porodica ne posjeduje drugi uslovan stambeni objekata za stambeno zbrinjavanje u svom vlasništvu.

Član 3.

(Potrebna dokumentacija)

(1) Zahtjev za ostvarivanje pomoći iz člana 1. ove odluke podnosi se Ministarstvu za rad, socijalnu politiku i izbjeglice Zeničko-dobojskog kantona (u daljem tekstu: Ministarstvo) i to najkasnije u roku 15 dana od dana nastanka nesretnog slučaja.

(2) Uz zahtjev je potrebno dostaviti sljedeću dokumentaciju:

- a) dokaz o utvrđenom pravu vlasništva/posjeda na oštećenom stambenom objektu (posjedovni list ili ZK izvadak),
- b) dokaz o prebivalištu/boravištu (CIPS),
- c) ovjerenu kućnu listu,
- d) dokaz o nastanku nesretnog slučaja usljed kojeg je stambeni objekat neuslovan za stanovanje (kopija zapisnika o izvršenom uviđaju nadležne policijske uprave),
- e) ovjerena izjava podnosioca zahtjeva da porodica ne posjeduje drugi uslovan stambeni objekat za stambeno zbrinjavanje u svom vlasništvu,
- f) kopiju kartice bankovnog tekućeg računa ili uvjerenje o otvorenom tekućem računu na ime podnosioca zahtjeva.

Član 4.

(Rješavanje o pomoći)

(1) Postupak odlučivanja po zahtjevu za ostvarivanja pomoći iz člana 1. ove odluke provodit će Ministarstvo.

(2) Ministarstvo će u postupku utvrditi sve činjenice i okolnosti od značaja za ocjenu osnovanosti zahtjeva i po istom odlučiti rješenjem.

Član 5.

(Visina pomoći)

Plaćanje troškova mjesečne stanarine utvrđuje se do iznosa:

- a) za jednočlanu porodicu 200,00 KM,
- b) za dvočlanu i tročlanu porodicu 300,00 KM,
- c) za četveročlanu i petočlanu porodicu 400,00 KM,
- d) za šestočlanu i veću porodicu 500,00 KM.

Član 6.

(Period važenja pomoći)

Rješenje o utvrđenom pravu na pomoć revidirat će se svaka dva mjeseca, provjerom činjenice o uslovnosti oštećenog stambenog objekta, izlaskom na teren od strane Komisije imenovane rješenjem ministra za rad, socijalnu politiku i izbjeglice Zeničko-dobojskog kantona.

Član 7.

(Finansiranje)

Finansiranje pomoći iz člana 1. ove odluke vrši se sa pozicije Ministarstva za rad, socijalnu politiku i izbjeglice.

Član 8.

(Stupanje na snagu Odluke)

Odluka stupa na snagu danom donošenja i bit će objavljena u „Službenim novinama Zeničko-dobojskog kantona”.

Broj: 02-11-4370/26

Datum, 06.03.2026. godine

Zenica

PREMIJER

Nezir Pivić

DOSTAVLJENO:

1x Ministarstvo za rad, socijalnu politiku i izbjeglice,

1x Ministarstvo finansija,

1x „Službene novine Zeničko-dobojskog kantona”,

1x a/a.